

ՎԱՐՁՈՒ ԱՇԽԱՏԱՆՔԸ ԵՐԵՎԱՆԻ ԽԱՆՈՒԹՅԱՆ ՄԵՋ
XVIII ԴԱՐՈՒՄ ԵՎ XIX ԴԱՐԻ ԱՌԱՋԻՆ ՔԱՌՈՐԴՈՒՄ*

Բ. Մ. ԸԱՐՈՒԹՅՈՒՆՅԱՆ

Երևանի խանությունը XVIII դարում Պարսից պետության ծայրամասային նահանգներից մեկն էր կազմում: Նա կառավարվում էր Իրանի շահի կողմից նշանակված նահանգապետներով, որոնք պաշտոնապես բեկլեբեկ էին կոչվում, իսկ տեղում նրանց անվանում էին պարզապես խան: Որպես ծայրամասային նահանգի պետ՝ Երևանի բեկլեբեկը միաժամանակ հանդիսանում էր զորքի հրամանատար, որին պատերազմի պայմաններում ենթարկվում էին նաև մի քանի այլ սահմանակից խանությունների զորքերը: Այս պատճառով նա կրում էր նաև սաբդար տիտղոսը:

XVIII դարի երկրորդ կեսին, Իրանում տեղի ունեցած գահակալական կռիվների և երկպառակությունների հետևանքով՝ Երևանի խանությունը փաստորեն անջատվեց Իրանից և առժամանակ ընկավ Վրաստանի թագավոր Իրակլի Բ-ի գերիշխանության տակ, պարտավորվելով վճարել վերջինիս տարեկան 40.000 թուման գումար, բայց պահպանելով իր ներքին ինքնավարական իրավունքները: Սակայն այդ կախումը երկար չտևեց: Դարի իննսական թվականներին, քաղաքականապես Վրաստանի թուլացման և Իրանում պետական իշխանության վերականգնման և ուժեղացման հետևանքով՝ Երևանի խանությունը նորից ենթարկվեց Իրանի կենտրոնական իշխանությանը:

Երևանի բեկլեբեկն իր կառավարման ենթակա երկրում սեփական ձեռքում էր կենտրոնացրել պետական ամբողջ ապարատը: Կենտրոնական իշխանությունը որոշ շահագրգռվածություն էր հանդես բերում միայն ֆինանսական,

*Հանդուցյալ Բ. Հարությունյանը վերջին տարիների ընթացքում Հայաստանի X—XIII դարերի սոցիալ-տնտեսական հարաբերությունների ուսումնասիրության գծով մեծ աշխատանք էր կատարել: Վաղածամ մահը թույլ չտվեց նրան տարիների իր աշխատանքը լրիվ ավարտել ու հանձնել տպագրության: Այնուամենայնիվ աշխատության ավարտված գլուխները զգալի հետաքրքրություն են ներկայացնում և արժանի են հրատարակության:

Հանդուցյալը թողել է նաև ձեռագիր մի քանի հոդվածներ, որոնք մեծ մասամբ թերավարտ են և կտրոտ վերջնական մշակման: Դրանցից է նաև սույն հոդվածը, որը նմանապես լրիվ ավարտված չէ: Հեղինակը նպատակ է ունեցել հոդվածին կցել XVIII դարի նոմինալ և ռեալ աշխատավարձի տատանումներն արտահայտող ու սպառման հիմնական արտադրանքների գների շարժումը պատկերող աղյուսակներ, կազմված Պետ. Մականահարանի Արխիվային բաժնում պահվող էջմիածնի վանքի հաշվեմատյանների տվյալներով, որոնք սակայն նա չի հասցրել ամբողջացնել: Այդ աղյուսակների սեղրությունները խիստ թերի են ու անմշակ և այդ վիճակում հնարավոր չէ հոդվածին կից հրատարակել (Խմբ.):

հատկապես հարկա-տուրքային խնդիրներում և երբեմն իր հատուկ պաշտոնյաների միջոցով ցուցակագրության ենթարկում պետական (դիվանի) հարկերի ենթակա օրյեկտները: Դարի վերջին, Վրաստանի վասալությունից Իրանի պետությանն անցնելով՝ Նրևանի սարդարն ավելի ընդարձակեց իր ինքնավարական իրավունքները. նա այժմ երկրի ինքնիշխան տեր էր համարում իրեն՝ պարտավորություն ունենալով միայն տարեկան որոշ գումար տուրք վճարելու Իրանի կենտրոնական իշխանությանը և պատերազմի ժամանակ ռազմական օգնություն հասցնելու նրան:

Երկրի ինքնիշխան տեր համարելով իրեն՝ սարդարը նայում էր արքունական հողերի և այլ կալվածքների (այգիների, ջրաղացների և այլն) վրա՝ որպես իր սեփականության: Նրանց մշակման և օգտագործման համար նա մեծ մասամբ բանեցնում էր գյուղական համայնքներից պարտադիր կարգով, որպես պետական պարհակ ստացվող բանվորական ուժը: Պետական պարհակով էին կատարվում նաև ճանապարհաշինարարությունը և նման աշխատանքները: Հողերի մի մասն էլ տրվում էր գյուղացիությանը «յարիքյարային» (կիսու) կարգով մշակելու:

ՎԱՐՁՈՒ ԱՇԽԱՏԱՆՔԻ ԿԻՐԱՌՈՒՄՆ ԲՆԱԳԱՎԱՌՆԵՐԸ

Վարձու աշխատանքի կիրառումը սարդարի ֆեոդալական տնտեսության մեջ վերոհիշյալ պարագաներում, բնականաբար, խիստ սահմանափակ էր և արտահայտվում էր գերազանցապես որակյալ բանուժի օգտագործման բնագավառում, այն էլ ղլխավորապես արդյունագործական ձեռնարկություններում (դինկ, ջրաղաց, չրեխ, ձիվհան և այլն) և բարդ շինարարական աշխատանքներում: Սակայն այս պայմաններում էլ վարձու սևագործ աշխատանքի համար ստեղծվել էին որոշ հնարավորություններ: Պարհակային կարգով տարվող վերոհիշյալ աշխատանքները սարդարը բաշխում էր ոչ թե առանձին տնտեսությունների, այլ գյուղական և քաղաքային համայնքների վրա, իսկ վերջիններս համապատասխան թվով աշխատանքային օրերի հաշվով բաժանում էին իրենց անդամ տնտեսությունների վրա: Գյուղական և քաղաքային ունևոր խավերը, շատ անգամ խուսափելով անձամբ լրացնելու իրենց վրա ընկած աշխատանքային օրերը, իրենց փոխարեն մշակներ էին վարձում գյուղի չքավոր տարրերից: Քիչ չէր պատահում, որ համայնքի վրա ընկած աշխատանքային օրերը լրացնելու համար «քյուղովի» մշակներ էին վարձում՝ մեծ մասամբ նույն համայնքի անդամ չքավորներից և ուղարկում աշխատանքի: Այսպիսի դեպքերում մշակներին տրված վարձը մուծվում էր համայնքի հասարակական ծախսերի մեջ և սրանց հետ միասին բաշխվում առանձին տնտեսությունների վրա:

Ի. Շոպենը՝ թվելով մի շարք այդպիսի աշխատանքային տուրքեր, որ ղրված էին սարդարի կողմից գյուղացիների վրա իր այգիների մշակման համար, հաշվում է, որ այդ «նարյադ»-ները նստում էին գյուղացիներին, չհաշված նրանք Նրևան քաղաքը գալու և վերադառնալու ժամանակը, մինչև 6000 ռանվորական օր¹:

¹ И. Шопен, Исторический памятник состояния Армянской области... СПб, 1852, էջ 960:

Պետական նշանակություն ունեցող խոշոր կառուցումների համար պարտադիր կարգով համայնքներից հավաքագրվող մշակների վարձը սովորաբար տրվում էր արքունական գանձարանից: Սակայն, շատ հաճախ այդ վարձը ավելի ցած էր լինում տվյալ ժամանակի և տեղի սովորական աշխատավարձից, ուստի համայնքները իրենց կողմից ուղարկված մշակներին տալիս էին յուրացուցիչ աշխատավարձ: Պատահում էր, որ արքունական գանձարանը բոլորովին չէր վճարում. այս դեպքում ամբողջ աշխատավարձը վճարում էին համայնքները: Այս կարգը, ինչպես երևում է, գալիս էր հնուց: Մխիթար Գոշի Դատաստանագրքի մեջ մենք հանդիպում ենք հետևյալ տողերին.

«Ի չինուածս քաղաքի և բեդդի եթէ պակասիցէ գանձ արքունի, ամենեքեան հասարակ վճարիցեն»¹:

Զարթուրա Ազուլեցին Երևանի բերդի արևելյան պարսպի շինության առթիվ գրում է.

«Թվին ՌՃԻԱ (1672) շահ-Սլեյման թագաւորէն ըռաղամ եկաւ Երևան Սէֆիդուլի խանին վերայ... Թէ՛ Երևանայ բերթի յարեւելյան կողմն մին պարսպ էլ քաշեն... Դարձեալ, ամեն երկիր գձեցին ջամի դօրայ, ամեն վարցն թագաւորական տվին: Ամա առանց հաց Կ (60) դիան տվին վարցն: Երկիր կէր, որ Ճ (100) դիան, ՃԾ (150) դիան բոնեցին: Ավել զարարն ամեն երկիր քաշեցին»²:

Մի այլ տեղ նա գրում է.

«Թվին ՌՃԻԲ (1673) յուլիս մեկումն Աքուլիս այսօր Երևան Սէֆիդուլի խանի յօքմով եկին Աքուլուց ու Դաշտէն էՃԾ (750) մարդ ուզեցին, Երևանայ բերդի կիսատն շինեն, ինչպէս անցեալ տարին: Լէ (37) մարդ գնաց, որ մինչի էՃԾ (750) մշակ բան անէ: Աքուլիս և Դաշտն այս Լէ (37) մարդիս մարդագլուխ ԴԻ (4000) դիան տվին: Թէ շահի փողէն էլ տան, բարի, Թէ չի տան, խօսվ այս է, որ տվին»³:

Խանության մեջ զգալի տեղ էին բռնում մուլքադարական գյուղերի համայնքներին պատկանող հողային տարածությունները և մասամբ իրենց՝ մուլքադարների անմիջական իրավունքի տակ եղած հողամասերը: Մուլքադարական անմիջական տնտեսությունները, այսինքն՝ մուլքադարի կամ նրա վերակացուի անմիջական ղեկավարությամբ և արտադրական միջոցներով տարվող տնտեսությունները, ինչպես իրենց ծավալով, նույնպես և իրենց տեսակարար կշռով ու ընդհանրապես երկրի տնտեսության մեջ ունեցած նշանակությամբ զգալի տեղ չէին գրավում:

«Մուլքադարը, — ասում է Ի. Շոպենը, — չէր կարող իրեն տեր համարել մուլք գյուղի որեւէ մասի, հողի և բնակիչների, նա միայն մասնակից էր սրանցից ստացված եկամտի... նրան արգելվում էր գյուղացիների վրա որեւէ անմիջական ազդեցություն ունենալ. նրա ամբողջ իրավունքը սահմանափակվում էր նրանով, որ հողի արտադրանքի հավաքումից հետո նա կարող էր պահանջել սարքյարից իրեն հասանելի բաժինը գյուղական ամբարից, ինչպես նաև հարկային գումարներից, որոնք հավաքվում էին մուլքադարական գյուղերից: Եթե մուլքադարը ցանկանում էր ինքը մշակել իր համար որեւէ հողամաս, ապա պի-

¹ Մխիթար Գոշ. Դատաստանագիրք հայոց, մասն երկրորդ. հոգված 1:

² Զարթուրա Ազուլեցի, Օրագրություն, 'Արմֆանի հրատ.', Երևան, 1938, էջ 112—113:

³ Նույն տեղում, էջ 119:

տի սարդարից թույլտվություն ստանալու, իսկ աշխատելու համար վարձեր գյուղացիներից բանվորներ նրանց բարի կամքով (ընդգծումը իմն է—Ք. Հ.), իսկ եթե մուքաղարն ապրում էր նույն գյուղում, որտեղ նրա մուլքն էր, այս դեպքում նա հողի հասարակական բաժանումների ժամանակ մյուս գյուղացիականներին (поселяне) հավասար ստանում էր իր անձնաբաժին (душевой участок) հողը, ոչ որպես կալվածատեր, այլ որպես սովորական գյուղական»¹:

Ինչպես տեսնում ենք՝ այս բնագավառում վարձու բանվորական ուժի կիրառման առիթներ և պայմաններ կան, միայն, անշուշտ, նույնպես սահմանափակ, որովհետև նախ մուքաղարներից շատերը չէին, որ ապրում էին գյուղում և, եթե ապրում էին, ապա զանազան զարտուղի ճանապարհներով օգտվում էին գյուղացիների ձրի բանվորական ուժերով. բացի այս, նրանց տրամադրության տակ գտնված հողերը քիչ էին և մեծ մասամբ կազմում էին այգիներ, բանջարանոցներ և խոտհարքներ. իսկ այս տեղերում, գլխավորապես կիրառվում էր շարեքաղարական սիստեմը:

Վարձու բանվորական ուժի կիրառման բավական լայն ասպարեզ կարող էր բացվել XVIII դարում արդեն զգալի տեղ զբաղեցնող հարուստ տնտեսություններում, երկրի գլխավորապես դաշտային մասերում, որտեղ տեխնիկական մի շարք աշխատակուլ մշակույթներ, ինչպիսիք են՝ բամբակենը, վուշինը, չալթուկինը և այլն, զգալի տեղ էին զբաղում:

Դեռևս XVIII դարում վերահիշյալ Զաքարիա Աղուլեցի վաճառականն իր այգին տնկելու և բերքատվության հասցնելու համար տառջին հինգ տարում «մինչև 2000 մշակ»² էր բանեցրել, ինչպես գրում է նա իր «Օրագրության» մեջ³: XVIII դարի երկրորդ կեսին և XIX-ի սկզբին մուքաղարները և գյուղի հաբուստները հաճախ տնկում էին նման այգիներ, որոնց վրա կատարված աշխատանքը տարվում էր մեծ մասամբ վարձու մշակների միջոցով: Ընդուն է, արդեն հասած այգիները մշակման էին հանձնվում կատեպաններին (բաղմաններին, բաղվանչիներին), այգու բերքի մի մասը նրանց հատկացնելով, սակայն այգին փորելու, էտելու, թաղելու, բաղհանելու և նման աշխատանքները, ըստ մեծի մասին, կատարվում էին վարձու բանուժի միջոցով, մանավանդ այն դեպքերում, երբ այգին մեծ տարածություն էր զբաղում:

Անհրաժեշտ է դիտել, որ ունևոր տնտեսություններում վարձու աշխատանքի ընդարձակմանը խանգարում էին վաշխառուական շահագործման մի բանի հանրաժանոթ եղանակներ, որոնք կիրառվում էին գյուղում բավական լայն չափերով. այսպիսիք էին, օրինակ, վաշխառուական տոկոսների փոխարեն չքավորին աշխատանքի հարկադրելը՝ վաշխառուի տնտեսության մեջ, չքավոր գյուղացու «հողի երեսը» մեկ կամ մի քանի տարով վերցնելը և նրան ստիպելը իր իսկ հողը մշակել կիսրարի սկզբունքներով և այլն:

Սիջակ և չքավոր տնտեսություններն աշխատակուլ մշակույթների համար կիրառում էին այսպես կոչված փոխնակային եղանակը. սրա էությունն այն էր, որ բանվոր ձեռքերի անմիջական, սուր կարիք զգացող տնտեսությունը

¹ Մ. Սոբեն, Նշվ. աշխ., էջ 926:

² «Մշակ»-ն այստեղ պետք է հասկանալ «բանվորական օր» իմաստով, մշակ բառը այս իմաստով գործածված է նաև XVIII դարի էջմիածնի վանական տնտեսության հաշիվներում:

³ Զաքարիա Աղուլեցի, Օրագրության, էջ 116:

դիմում էր իր հարեաններին և նրանցից փոխ էր վերցնում բանվորական օրեր և ապա նրանց համար հարկավոր ժամանակին իր բանվորական ուժը տրամադրում նրանց, որպես հատուցումն փոխի։ Այս ձևը մեր գյուղերում կիրառվում էր մինչև կոլխոզային շինարարության սկիզբը։ Փոխնակային այս եղանակը, անշուշտ, սահմանափակում էր վարձու բանուժի կիրառումը։

Երևանի խանության մեջ բացառիկ տեղ էր գրավում էջմիածնի վանական տնտեսությունը, որի պատմա-տնտեսագիտական հետազոտությունը մենք տվել ենք ռուսերեն լեզվով գրած «Крупное монастырское хозяйство в Армении в XVII—XVIII вв.» աշխատության մեջ, ուստի այստեղ հարկ չենք համարում մանրամասնորեն կանգ առնել դրա վրա։ Նշենք միայն, որ այստեղ յուրահատուկ պայմանների շնորհիվ, բավական լայն կիրառումն ունեն վարձու և կիսավարձու բանվորական ուժը։ էջմիածնի տնտեսությունը խոշորագույնն էր Երևանի խանության մեջ։ Նա ընդգրկում էր իր մեջ ոչ միայն բավական խոշոր լատիֆունդիալ մի տնտեսություն իր բոլոր օժանդակ ձեռնարկումների հետ միասին, մեծ տարածությամբ այգիներ, ջրաղացներ, դիակեր, ձիթհաններ և այլն, զգալի թվով մուլփաղարական և թիուկական գյուղեր, որոնցից նա ստանում էր բահրա և մուլք, նա զբաղվում էր նաև առևտրաբանկային գործառնություններով, տարածելով իր գործունեության շրջանակը մինչև Հնդկական և Աստղանոյան օվկիանոսի ափերի վաճառաշահ քաղաքներում տեղ գտած հայ գաղթավայրերը։ Ընդարձակ և բազմակողմանի մի այսպիսի տնտեսություն, որը բացի իր տնտեսական եկամուտներից, ստանում էր խոշոր միջոցներ նաև արտատնտեսական աղբյուրներից (ուխտավորներից, նվիրատվություններից, «աթոռահասից», «պտղից» և այլն), բնականաբար չպիտի կարողանար բավարարվել գյուղացիների կողմից վճարվող կոռային ունեության մնացուկներով, ինչպիսիք էին, օրինակ, գյուղացիների պարտավորությունը յուրաքանչյուր ընտանիքից մի-մի հնձվոր տալու, բերքը տեղափոխելու և նման մի քանի, համեմատաբար չնչին նշանակություն ունեցող պարտավորությունները։

Գյուղատնտեսական մեծ աշխատանք կլանող կուլտուրաների (բամբակ, չալթուկ և այլն) ծավալումը պահանջում էր մեծ քանակությամբ սեզոնային բանվորական ուժ, սրա կողքին՝ կրոնական և տնտեսական նշանակություն ունեցող խոշոր շինարարությունները նույնպես պահանջում էին բանուժ թե՛ սե, և թե՛ որակավոր աշխատանքների համար։ Այս բոլորից հասկանալի է, թե ինչու էջմիածնի վանքի բանեցրած բանվորական ուժը, ինչպես ցույց են տալիս հաշվեմատյանները, հաճախ անցնում էր տարեկան քսան հազար բանվորական օրից։

Բարերախտաբար Հայկական ՍՍՌ Պետ. Մատենադարանի արխիվում մնացել է էջմիածնի տնտեսության հաշվեմատյանների մի ստվար մասը, որը հնարավորություն է տալիս ուսումնասիրելու և պարզաբանելու պատմա-տնտեսագիտական մի շարք կարևոր խնդիրներ, որոնցից մեկն է նաև աշխատավարձի հարցը, որին նվիրված է հոդվածս։

Կարելի է տարակուսել այն բանում, թե էջմիածնի վանական տնտեսության հետ կապված տվյալները աշխատավարձի և գների վերաբերյալ կարելի է հատկանշական համարել նույն ժամանակաշրջանի Երևանի խանության ալբտնտեսությունների աշխատավարձային և առևտրական հարաբերությունների համար, թե՛ այդ վանական տնտեսությունը առանձնահատուկ պայմաններում

էր գտնվում, ուստի և այդ տվյալները ու նրանցից բխող Լորդ Բլեյքսթոնի վերաբերյալ տեղեկությունները որևէ չափով չի կարելի տարածել Երևանի խանության մեջ Եղած նման հարս-
րերությունների վրա:

Անտարակույս, էջմիածնի տնտեսությունն ունի իր առանձնահատկու-
թյունները: Էջմիածնի վանքն ունի Վաղարշապատի պես մեծ գյուղ, որին նա
տիրում էր թիուական իրավունքով, մի շարք այլ գյուղեր՝ Օշական, Եղվարդ
և ուրիշներ, որոնց նա տիրում էր մուլքադարական իրավունքով: Մյուս կողմից
նա կարողանում էր այլևայլ ապօրինի միջոցներով բանվորներ հա-
նել և աշխատեցնել իր տնտեսության մեջ: Սակայն, նյութերի ու շահերի փնտ-
թյունը ցույց է տալիս, որ վարձու մշակների կոնտինգենտը մեծ մասամբ բաղ-
կացած էր օտար վայրերից եկած կամ, առնվազն, ոչ էջմիածնապատկան մուլ-
քային գյուղերի բնակչությունից: Վարձու մշակների մեջ հաճախ են պատա-
հում Թուրքիայի՝ Երևանի խանությանը կից փաշալիկների հայ բնակիչներ, մին-
չև իսկ թուրքեր և քրդեր: Սրանց նկատմամբ էջմիածինը որևէ բռնություն գործ
չէր կարող. սրանք ազատ, պայմանային կարգով աշխատող մշակներ էին:
Բացի այս, թիուային գյուղերի բնակիչների պարտքն էր, ըստ ժամանակի
սովորությունների, միայն մի քանի կարգի աշխատանքներ հարկադրաբար կա-
տարել թիուդարի համար, ինչպիսիք են՝ հացահատիկների հունձը, բերքի փո-
խադրումը և այլն: Այլ աշխատանքները նրանք կատարում էին, ճիշտ է, եր-
բեմն ապօրինաբար. բոնի կարգով, բայց նրանց վճարվում էր աշխատավարձ
ընդհանուր կարգով: Ինչպես պարզվում է տվյալներից, էջմիածինը որպես մուլք
պատկանող գյուղերի բնակիչներից մշակ վարձվածները և այլ տեղերից եկած
ների աշխատավարձի միջև տարբերություն չկա, կամ դա շնչին է:

Երևանի մի օրինակ, որը քաղում ենք 1768 թվականի հաշվետվությանից
(թղթ. 111, վավ. 8):

«Եղուարդայ առու հանող մշակքն Եղեն ԱՃՂԹ (199) հողիք, որոց ԱՃՂԹ
(138) հողույն օրն Ժ (10) վարայով (=167 դիան), Լուու Բ (2) թուման ԿԻ
(3000) դիան. ԿԱ (61) հողի գեղացվոցն օրն Ա (1) ապասեալ (=200 դիանի—
Բ. Հ.) խօշկամուղդ. Լուու Ա (1) թուման ԲԻԲԾ (2200) դիան. ջամն է Գ (3)
թուման ԵԻԲԾ (5200) դիան»:

Այստեղ գիտողության արժանի է այն, որ էջմիածնի վանքը, որ Եղվարդ
գյուղի մուլքադարն էր, գյուղի առվահանի աշխատանքի համար անգամ վարձ
է վճարում նույն գյուղի այն բնակիչներին, որոնք մասնակցում են առվահանին:

Նույն դավթարի մի այլ հատվածում ասված է.

«Ղոի և բոլոր մեր այգեաց մեր գեղացուց մշակքն էտորքն Եղեն ԵՃԺԵ
(515) մշակք խօշկամուղդ (այսինքն՝ առանց օրական սնունդը տալու, սնունդը
մշակի հաշվին — Բ. Հ.). մին օրն Ժ (10) վարայով. որոց վարձքն Լուու Բ (8)
թուման ԵՃԺԾԳ (5835)¹ դիան: Սոցա ԽԷ (47) մշակքն ուշկնեցիք (=օշական-
ցիք—Բ. Հ.) են և այլք մեր գեղացիք (—վաղարշապատցիք—Բ. Հ.):

Այս հանդամանքները թույլ են տալիս էջմիածնի վանքի տնտեսության
վերաբերյալ հարուստ տվյալներ օգտագործելու Երևանի խանության մեջ տո-
ցիալ-տնտեսական որոշ հարաբերությունների և մասնավորապես, վարձու աշ-
խատավարձի ուսումնասիրության համար:

¹ Պետք է լինի ԵԻԲԺԷ, եթե 5835 թիվը ճիշտ է (խմբ.):

ՎԱՐՁՈՒ ԲԱՆՎՈՐԱԿԱՆ ՈՒԺԻ ԱՂՔՅՈՒՐՆԵՐԸ ԵՎ ԿՈՆՏԻՆԳԵՆՏԸ

Հարց է ծագում, թե գերիշխող նախնական տնտեսության պայմաններում որտեղից էր կոմպլեկտավորվում այդ վարձու բանվորական ուժը: Այս հարցին պատասխանելու համար առաջին հերթին պետք է հաշվի առնել սոցիալ-տնտեսական այն կացությունը, որի մեջ էր գտնվում Երևանի խանութային և հարևան շրջանների գյուղացիությունն այս ժամանակաշրջանում:

XVIII դարը Երևանի խանութային համար քաղաքական աղետների մի շրջան էր: Թուրք-պարսկական պատերազմները դարի առաջին կեսին, լեզգիների հաճախակի ավերիչ և սահաբեկիչ ասպատակությունները, Բրակլի թագավորի կրկնակի արշավանքները ցան ու ցրիվ էին արել գյուղական բնակչությունը, և իր վաղվա օրվան անվստահ գյուղացին շատ անգամ գերադասում էր աշխատել շնչին աշխատավարձով, մինչև իսկ «հացփորի», քան նորից վերադառնալ իր ավերված տնտեսությունը: Այս երևույթը տարածվում էր ոչ միայն Երևանի խանութային, այլև հարևան թուրքական փաշալիկների (Բայազետի, Կարսի, Ախալցխայի և այլն) վրա: Այս կարգի աշխատավորությունը մեծ մասամբ վարձվում էր համեմատաբար երկարատև ժամանակով՝ տարով կամ սեղոնով:

XVIII դարի երկրորդ կեսին Երևանի խանութային գյուղացիության մեջ տարբեր զգալի շերտավորում կար: Այդ նկատվում էր առանձնապես դաշտային և նախալեռնային շրջաններում ընկած գյուղերում, որտեղ տարածված էր աշխատանք կլանող տեխնիկական բույսերի և խաղողի մշակույթը: Այս մշակույթներն ավելի շուտ էին կապվում շուկայի պահանջների և դրամական շրջանառության հետ: Ճիշտ է, չքավոր գյուղացիությունը շահագործվում էր ունևորների կողմից ֆեոդալական միջավայրին հատուկ ձևերով — հողերը կիսու տալով, վաշխառական տոկոսների փոխարեն մշակություն անելով ունևոր վաշխառուի տանը և այլն, սակայն չքավոր և կիսաչքավոր գյուղացիության որոշ մասը իր տնտեսությունից դուրս աշխատում էր նաև օրավարձով: Այս նրա համար հիմնական աղբյուր չէր, բայց որոշ չափով օժանդակում էր նրա տնտեսությանը: Այսպես՝ վարձու աշխատավորության երկրորդ և կարևոր աղբյուրը չքավոր գյուղացիությունն էր:

Դաշտային գյուղերի համար բանվորական ուժի երրորդ աղբյուրն էր հանդիսանում լեռնային շրջանների գյուղացիությունը: Լեռնային գյուղերի բնակիչները գլխավորապես պարապում էին անասնապահությամբ և հացահատիկային մշակույթներով, որոնք համեմատաբար քիչ աշխատանք են պահանջում, քան տեխնիկական մշակույթները դաշտային շրջաններում: Բացի այս, լեռնային շրջաններում հացահատիկներն ավելի ուշ են հասնում, ուստի և այստեղի բանվորական ուժը հնարավորություն ուներ մասնակցելու դաշտային մասի բերքահավաքի աշխատանքներին, մինչև իրենք կհասնեն:

Վարձու բանվորական ուժի չորրորդ և ավելի կարևոր աղբյուրն էր հանդիսանում (մանավանդ էջմիածնի տնտեսության համար) թիուլական գյուղերի բնակչությունը, որի վրա թիուլդարը հնարավորություն ուներ որոշ բռնություն գործ դնելու, իր համար թեկուզ վարձով աշխատեցնելու: Այս կողմից շատ ընդունակ էին էջմիածնի վանքի գործողությունները Վաղարշապատ գյուղի բնակիչների նկատմամբ, որի ցայտուն նկարագիրը կարելի է տեսնել վաղարշապատցի

«Հարություն Արարատյանի կյանքը» ինքնակենսագրական բնույթի գրվածքում¹, որը վերաբերում է XVIII դարի երկրորդ կեսին:

Գյուղատնտեսական տեխնիկայի ցածր մակարդակի հետևանքով որակյալ բանվորական ուժի մեծ պահանջ չկար. այստեղ դեր էր կատարում ոչ այնքան գիտությունը և վարժականությունը, որքան ֆիզիկական ուժը և դիմացկունությունը: Որակյալ բանվորներ էին համարվում գյուղատնտեսության ասպարեզում կատեսպանները (բաղվան, բաղվանչի, ալգեսպան), բոստանչիները և սրանց նմանները, որոնք տարիներ լինում էին տվյալ ասպարեզում: Սրանք աշխատում էին մեծ մասամբ ոչ օրավարձով, այլ սեղոնով կամ շարեքղարային սկզբունքով: Բացի սրանցից որակավոր էին գյուղատնտեսությանն սպասարկող արհեստավորները՝ դարբին, խառատ և այլք, իսկ շինարարության մեջ՝ որմնադիրը, նախշքարը, հյուսնը:

Այս արհեստավորները, որոնք մեծ մասամբ սպասարկում էին երկրագործությանը, ֆեոդալական միջավայրի նատուրալ տնտեսության պայմաններում համեմատաբար բարձր աշխատավարձ էին ստանում և մեծ հարգանքի արժանանում: Դեռևս XII դարում Մխիթար Գոշն իր Դատաստանագրքում արհեստների մասին գրում էր. «Հարկատրք և օգտակարք յարուեստս հողագործութիւն է և դարբնութիւն և հիւանութիւն և բաղմաց է հողագործել. առաւել պատուիցի երկաթագործ և փայտագործ»²: Այս կարգի անուն հանած արհեստավորները հաճախ հրավիրվում էին հեռու վայրերից, մնում նոր տեղում բավական երկար ժամանակ, ստանում էին լավ աշխատավարձ և պատվով ու նվերներով վերադառնում իրենց հայրենիքը:

ՎԱՐՁԻ ՊԱՅՄԱՆՆԵՐԸ ԵՎ ԱՇԽԱՏԱՎՈՐՁԻ ՁԵՎԵՐԸ

Երկրագործական բանվորները վարձվում էին սովորաբար սեղոնով և օրով, հազվագյուտ դեպքերում՝ նաև տարով: Սեղոնային էին, օրինակ, ձմեռային և ամառային մշակները կամ հողաղնները, նախընտրելի էին, բոստանչիները, կատեսպանները: Ամառային սեղոն էր համարվում մշակների համար վաղ գարնանից՝ բարեկենդանից, որոշ վայրերում «միջինք»-ից³ մինչև ուշ աշունը՝ «նախքութողը»⁴: Սեղոնային աշխատողները ստանում էին կամ որոշակի աշխատավարձ՝ դրամով, թե բնամթերքով, ինչպես օրինակ՝ հողաղնները, կամ թե՛ բերքի որոշ մասը, ինչպես օրինակ՝ կատեսպանները, բոստանչիները և ուրիշներ: Աշխատավորների որոշ կատեգորիաներ, ինչպես օրինակ՝ հնձվորները, այդի կթողները և ուրիշներ ստանում էին հավաքած բերքի որոշ տոկոսը:

«Բերքահավաքին, — գրում է Ի. Շոպենը, — արտադրանքի մի մասը պահվում էր հօգուտ հնձվորների, թեկուզ և այդպիսին ինքը՝ հնձատերը լիներ: Այդ մասը կազմում էր՝ ցորենից և գարուց — 1/10 մասը, իսկ շալթուկից և բամբակից — 1/20-ականը»⁵:

¹ «Հարություն Արարատյանի կյանքը», թարգմ. Պ. Պոռյանի, Խիֆիս, 1892:

² Մ. Կոշ. Դատաստանագիրք հայոց, 2-րդ մաս, գլ. 1:

³ «Միջինք» կոչվում էին «մեծ պասի» 4-րդ շաբաթվա օրերը:

⁴ «Նախքութող» էր կոչվում նախիրը թողնելու ժամանակը, որն ընկնում էր սովորաբար նոյեմբերի վերջերին, դեկտեմբերի սկզբներին. այսինքն՝ այն ժամանակ, երբ դաշտային աշխատանքները բոլորովին վերջանում էին:

⁵ Մ. Մ. Շոպեն, նշվ. աշխ., էջ 1131:

Սեզոնային աշխատավորների որոշ կատեգորիաներ, ինչպես օրինակ, հոտաղները, ստանում էին սնունդ, ինչպես նաև հագուստ, որը սովորաբար բաղկացած էր մեկ շուխայից, մեկ պակից, շորի գոտուց, մեկ շալվարից, մի գույքոտնամանից («հեկի») և 20 «պազ» կտավից: Բնականով տրվող այս հագուստեղենի փոխարեն կարող էր վճարվել նաև նրա արժեքը դրամով: Էջմիածնի հաշվեմատյանների մեջ հանդիպում ենք այսպիսի հոդվածների.

1. «Ե (5) ապասի Լտու մշակ Անդրէասին հեկուն, դոտուն, շալվորին և Ի (20) պազ կտավի գին»:

2. «Ը (8) ապասի շահրիարցի մշակ Մկրտչին հին տարէն. Դ (4) ապասի Լտու շուխին և գտակին»-ը (1739 թ. հաշվեմատյանից):

Սնունդ և հագուստ ստանում էին նույնպես տարով վարձավածները: Այսպես, 1800 թ. հաշվեմատյանում, հոկտեմբերի 6-ի տակ կարդում ենք. «Ամալայից աղադաւ մաշիկ կարել Լտուք ԳՃ (300) ջուխտ», իսկ 1750 թ. հաշվեմատյանում, հոկտեմբերի 8-ի տակ՝ «Դտակ կարել Լտու մշակաց. վարձն Լտու մի հագար հինգ հարիւր դիան»:

Աշխատանքային օրվա տևողությունը գյուղատնտեսական բանվորի, ինչպես նաև օրավարձով աշխատող արհեստավորի համար ձգվում էր արեւածագից մինչև արեւամուտը: Արարատյան դաշտի աշխարհագրական-կլիմայական պայմաններում ամառվա ամիսներին այդ տևողությունը հասնում էր օրական 14—15 ժամի:

Գյուղատնտեսական բանվորները աշխատանքի էին գնում իրենց գործիքներով. փորվորն իր բահով, էտվորն իր մկրատով, քաղհանավորն իր ուրագով, հնձվորն իր գերանդիով կամ մանգաղով: Բացառությամբ էին կազմում հոտաղները, մաճկալները և նման կարգի մշակները, որոնք չէին աշխատում բացառապես մի գործիքով, կամ գործ ունեին գոթանի, արորի և սրանց նման արտադրական խոշոր ու թանկարժեք գործիքների հետ. այսպիսի գործիքները գործատիրոջն էին պատկանում: Արխիվային հաշվեմատյաններում հանդիպում ենք այնպիսի օրինակների, երբ բանվորի աշխատավարձից հանվում էր որոշ գումար այն ղեպերում, երբ նա աշխատում էր գործատիրոջ գործիքով:

1743 թվականի ելեմտից դավթարի մեջ կարդում ենք հետևյալը.

«Ետու նոյն Դ (3) այգեաց փորվոր ԱՌԱՃԿԱ (1161) մշակաց Թ (9) փողով, ԻԴ (24) շալիւրոց Դ (3) փողով նոյն վարդապետաց ձեռօք, բայց ԵՃԻԴ (524) բահ մեր էր, Ա Ա (մեկ-մեկ) փող բահազլուխ կտրեցաւ»: Գործատերը, ըստ հին սովորության, պարտավոր էր կերակրել բանվորին, իսկ եթե չէր կերակրում՝ պարտավոր էր որոշ գումար «հացագին» տալ նրան: Էջմիածնի 1767 թ. հաշվեմատյանում (թղթ. 2, վավ. 4) կարդում ենք.

«Լուծ քշողք եղեն Դ (3), մին Դ (4) փարայով. Բ (2) փաբա ևս հացագին Լտու»: Մեր ուսումնասիրության ենթակա ժամանակաշրջանում, առավելապես վերջին տասնամյակների ընթացքում, ավելի հաճախակի են պատահում բանվորներ, որոնք աշխատում են «հացն իւրեանց» (իրենց հացով) կամ «խոշկամուզ»։ Այսպիսի ղեպերում նրանց օրավարձի մեջ մտնում է նաև «հացագինը», թեև հաշիվների մեջ բուն աշխատավարձը և հացագինը դիֆերենցիացիայի չեն ենթարկվում: Հասկանալի է, որ «խոշկամուզ»-ով աշխատողն ավելի էր ստանում փողով, քան նա, ով աշխատում էր գործատիրոջ հացով («մեր հացովն»):

Պետք է նշել, որ «Հաց» հասկացողությունն ընդգրկում էր աշխատավորի օրական ամբողջ սնունդը:

Հետաքրքրական է, որ բնամթերքով ստացող գործարքային բանվորը կարող էր հրաժարվել իր վարձը մթերքով ստանալուց, եթե այդ մթերքն անորակ էր, կամ որևէ բնական աղետի հետևանքով բերքը փչացել էր:

Էջմիածնի հաշվեմատյանների մեջ պատահում ենք այս կարգի հողվածներին:

1. «Արտորայքն մեր ցորեան թէ գարի հնձել ետուք, որոց հնձուրքն իւրեանց վարձն խուրձն չափին վասն կարկուտ տալուն, այլ Ռ(1000) խրձանն ԲՌԵՃ (2500) դիան՝ վարձն դրամով ետուք, որք էին հնձեալ ԽԸՌԹԾԾ (48950) խուրձն, որոյ հնձելավարձն ետուք... ԺԲ ԲՌԳԾՀԵ դն. (12 թուման 2375)» (սեպտ. 28, 1768 թ.)¹:

2. «Կատեպանացն մերոց՝ թէ տեղւոյս (Վաղարշապատի—Բ. Հ.) թէ 3օշականայ, թէ Փարաքարայ, և թէ Նորագեղայ, վասն այգևաց ցրտահաւուրեւան նաղտ ետուք զհախսն. տեղւոյս ԺԵ (15) կատեպանացն ԸՌ (8000) դիանիւ, ետու Ը (8) թուման, ԸՌ (8000) դիան»²:

Խիստ ուշագրավ է դործատիրոջ «հացով» և «խոշկամուզը» (իր՝ աշխատող բանվորի «հացով») աշխատողների օրավարձի փոխհարաբերությունը: Որպեսզի կարելի լինի քիչ թե շատ պարզ և համեմատաբար ճիշտ գաղափար կազմել այդ մասին, բերում ենք մի քանի օրինակներ, որոնք վերաբերում են տարբեր տարիներին:

Այսպես.

1759 թ. (թղթ. 2, վավ. 4).

«Նորագեղի մի այգուց ԶԸ (88) փորող մշակաց ետու վարձ Գ (3) շահի և կիսով (=175 դիանի) խոշկամուզը մին թուման հինգ հազար ԴԾ (400) դիանի սոյն (մարտ) ամսոյ քսան վեցին»:

«Այս այգւոյ էտող մշակքն են ԾԶ (56), որոց վարձն ևս տուաք Գ (3) շահի և կիսով. նոքա ևս են խոշկամուզի»:

Հետևյալ հողվածում կարդում ենք.

«Ղոփ այգւոյ փորող ԳԾԳ (303) մշակաց վարձ ետու Դ Դ (չորս-չորս) փարայով. տուաք երկու թուման երկու հարիւր դիանի սոյն (մարտ) ամսոյ ԺԻ (17-ին)»:

Չորս փարան — $4 \times 16^{2/3}$ դիան = $66^{2/3}$ դիան ≈ 67 դիան:

Այս տվյալներից անում ենք այն հետևությունը, որ 1) խոշկամուզը կամ հացն (սնունդը) իր հաշվին աշխատող մշակը ստանում է ¹⁷⁵/₆₇ կամ մոտավորապես 2,5 անգամ ավելի, քան «հացը գործատիրոջ հաշվին» աշխատող մշակը, և 2) մեկ մշակի օրական սնունդը հաշվվում էր 175 դն. — 67 դ. = 108 դիան:

1766 թ. (թղթ. 2, վավ. 4).

1. «Ղոփ այգւոյ թաղորքն Բ (2) շափթէն եղև ԵՃԻԲ (522) մշակք. մին է (7) փարայով (=117 դիան), որոց ետուք վեց թուման ԲԾ (900) դիան, նոյ. 5-ին»:

2. «Ուշականա այգևաց քաղորւն եղեն ԾՂԴ (194) մշակ խոշկամուզը, այն Դ (3) շահով (=150 դիան) որոց ետուք Բ (12) թուման ԹՌԱԾ (9100) դիան»:

Տարբերությունը՝ 23 դիան:

¹ Թղթ. 3, վավ. 8, էջ 27:

² Նույն տեղում, էջ 363:

1767 թ. (թղթ. 2, վավ. 4).

1. «Բամբակի քաղհանաւորք Եղեն ԲՃԾԲ (252) մշակք. մին մշակն Դ (4) փարայով (= 67 դիան)...»:

2. «Փարաքարայ ալգոյ քաղհանաւորք Եղեն ԺԴ (14) մշակ. մին մշակ Դ (3) շահով (= 150 դիան) խոշկամուղդ...»:

Տարբերությունը 83 դիան:

1786 թ. (թղթ. 3, վավ. 8).

«Աշտարակայ երկու ալգեաց փորողքն ՀԴ (74) հոգիք խոշկամուղդ օրն Ա (1) ապասով (= 200 դիան) Ետու Ա ԴՌԸՃ դիան (1 թուման 4800 դիան)»:

Մանրութիւն. այս կարգի մյուս բոլոր մշակներն էլ ստացել են խոշկամուղդ, մեծ մասամբ մեկ ապասի (200 դիան), երբեմն էլ՝ ԺԳ (13), ԺԴ (14) և ԺԵ (15) փարա, որը դիաններով հաշված՝ կլինի 217, 233 և 250 դիան: Մինչդեռ «մեր հացովն» (այսինքն՝ վանքի, գործատիրոջ հացով) աշխատողներն ստացել են մեծ մասամբ Բ շահի (= 100 դիան), երբեմն էլ՝ Է (7) փարա (= 117 դիան):

Տարբերությունը — 100 — 133 դիան, կամ ավելի՝ մոտ 2 անգամ:

1811 թ. հոկտ. ամսի 19-ին (թղթ. 20, վավ. 211).

Այդի թաղող մշակներին վճարված է օրավարձ՝ առանց հացի (խոշկամուղդ) — ԵՃ՝ (500) դիան, հացը վանքից (գործատիրոջից) — ԲՃ՝ (200) դիան:

Մանրութիւն. հացը գործատիրոջից 200 դիան աշխատավարձն ընդհանուր է նաև մարգոսավորների, փայտ կտրողների և նման մշակների համար:

Տարբերությունը — 150 դիան, «խոշկամուղդ»-ը 2,5 անգամ ավելի է «հացը գործատիրոջից» աշխատավարձի համեմատությամբ:

ԱՇԽԱՏԱՎԱՐՁԻ ԶԱՓԸ ԵՎ ՇԱՐԺՈՒՄԸ

Աշխատավարձի չափի և նրա շարժման ուսումնասիրությանը նպաստող մեր ձեռքի տակ եղած նյութերը վերաբերում են գլխավորապես էջմիածնի վանական տնտեսությանը և ընդդրկում են մոտ 80 տարվա ժամանակաշրջանի, այն է՝ 1740-ական թվականներից մինչև 1820-ական թվականները, այսինքն՝ մինչև Երևանի խանության Ռուսաստանին միանալու նախօրյակը: Թե որքան հնարավոր և ընդունելի է օգտագործել այդ տվյալները Երևանի խանության մեջ տարածված վարձու աշխատանքային և աշխատավարձային հարաբերությունների պարզաբանման համար, այդ մասին մենք խոսել ենք վերևում: Ավելացնենք այն, որ էջմիածնի ելևմտից մատյաններն ընդհանուր առմամբ տարված են բավական խնամքով և ժամանակի հաշվապահական կանոնների համաձայն: Բացի աշխատավարձի մասին տվյալներից, այնտեղ մենք գտնում ենք այդ տարիների վերաբերյալ առաջնակարգ անհրաժեշտության սննդամթերքների (գարի, ցորեն, ընդհ, միս, յուղ և այլն), հագուստեղենի (կտավ, գլխարկ, ոտնաման և այլն), գործիքների և կենցաղի ու տնտեսության մեջ գործածվող այլ իրերի գներ: Աշխատավարձի և գների վերաբերյալ այս նյութերը լրիվ չեն յուրաքանչյուր տարվա համար. նրանք պատահական են և անսխառն գրված, բայց բավականին շատ են և բազմակողմանի. նրանց ուսումնասիրությունը հնարավորություն է տալիս բավական մոտավոր պատկեր ստանալ աշխատավարձի չափի և շարժման մասին:

Աշխատավարձը և գները էջմիածնի «ղավթարներում» նշանակված են Երևանի խանության սահմաններում այդ ժամանակ շրջանառության մեջ գտնվող իրանական (թուման, հաղարդիան կամ մինալթուն, ապասի, շահի, դիան, փող) և թուրքական (դուրուշ, փարա) դրամական միավորներով: Հաշվասկզբության մեջ հանրագումարներ տալը հեշտացնելու համար թուրքական դրամները վեր են ածված համապատասխան իրանական դրամների, գլխավորապես դիանների:

Աշխատավարձի շարժումը որոշելու համար անհրաժեշտ է յուրաքանչյուր տարվա աշխատավարձի միջինը որոշել ըստ աշխատավորների կատեգորիաների: Հայտնի է, որ օրավարձով աշխատողների, մանավանդ գյուղատնտեսական բանվորների աշխատավարձը պակաս տատանումներ է ունենում ըստ սեզոնի, ըստ տեղի և ըստ աշխատանքի որակի: Մեր ունեցած նյութերը թեև բավական շատ են, բայց թե՛ ըստ քանակի, և թե՛ ըստ բազմազանության, հնարավորություն չեն տալիս գիտական մեթոդներով աշխատավարձի միջինը որոշելու. ուստի, տարեկան միջին ենք համարում տվյալ կատեգորիայի բանվորների համար այն աշխատավարձը, որն ավելի հաճախակի է կրկնվել: Ինչ վերաբերում է աշխատավարձի տատանումներին Երևանի խանության մեջ ըստ դավառների, ապա այդ որոշելու հնարավորության բացակայության պայմաններում, մենք որպես միջին ընդունում ենք Վաղարշապատին, Օշականին և մոտակա գյուղերին վերաբերող տվյալները, որոնք մեկ թվում է, շատ հեռու չպետք է լինեն իսկական միջինից, քանի որ այդ վայրերը ոչ քաղաք են, և ոչ էլ հետամնաց գյուղեր:

Գյուղատնտեսական աշխատավորներին կարելի է խմբավորել հետևյալ կատեգորիաների մեջ:

Առաջին կատեգորիա — այգու և բանջարանոցի փորվորներ, էտվորներ, մարգոսավորներ և նման ոչ որակավոր աշխատանք կատարողներ: Սրանց աշխատավարձը, ինչպես ցույց են տալիս նյութերը, իրարից համարյա չեն տարբերվում:

Երկրորդ կատեգորիա — քաղհանավորներ, աղունավորներ, բրինձ ընտրողներ և այլն: Սրանք համարյա բացառապես կանայք են, եթե չհաշվենք չալթուկի քաղհանավորներին, որոնք, ըստ մեծի մասին, տղամարդիկ են, ուստի և ստանում են համեմատաբար ավելի բարձր աշխատավարձ:

Յրրորդ կատեգորիա — լուծ քշողներ, «դուշ քշողներ», չայիր (մոլախոտ) հավաքողներ և նմաններ: Սրանք մեծ մասամբ պատանի, երբեմն՝ մանուկ աշխատավորներ են:

Չորրորդ կատեգորիա — գյուղատնտեսության սպասարկող արհեստավորներ՝ խառատներ (հյուաններ), նալբանդներ և այլն, սրանց թվում են նաև շինարարական վարպետները՝ որմնադիրները (բաննահները):

Հինգերորդ կատեգորիա — մանր սրղյունագործական (դիակի, ջրադացի, չրեխի և այլն) մշակներ:

Անհրաժեշտ է նկատի առնել, որ որոշ կարգի գյուղատնտեսական աշխատավորներ, թեև կատարում են հատուկ որակ չպահանջող, սակայն դժվարին և մեծ եռանդ կլանող ֆիզիկական աշխատանք: Այդպիսիք են, օրինակ՝ գերանդի բաշող հնձվորները: Թեև ըստ որակի կարելի էր սրանց մեր կլասիֆիկացման առաջին կատեգորիայի մեջ հաշվել, սակայն այդպես չենք վարվել. սրանք համեմատաբար ավելի բարձր աշխատավարձ են ստանում: Միջին աշխատա-

վարձը հանելիս մենք այս կարգի աշխատավորներին հաշվի չենք առել: Ի դեպ պիտի ասել, որ դրամով աշխատող հնձավորներ շատ քիչ են պատահում. սրանք սովորաբար ստանում են հնձածի որոշ տոկոսը: Դրամով վճարելու դեպքում սրանց օրավարձը կրկնակի, մինչև իսկ եռակի ավելի է հասարակ բանվորի աշխատավարձից:

Կանանց վարձու աշխատանքը, ինչպես նկատեցինք վերևում, կիրառվում էր գլխավորապես բամբակի, բանջարանոցների և այգիների քաղհանի համար ու ֆիզիկական մեծ ուժ չպահանջող գործերում: Ուշագրավ է, որ չալթուկի քաղհանավորներն ընդհանրապես տղամարդիկ էին լինում, ուստի և նրանց աշխատավարձն ավելի բարձր էր, քան բամբակի քաղհանավորներինը: Այս երե-վույթը բացատրվում է նրանով, որ չալթուկի քաղհանը պահանջում էր ոտա-րորիկ, մինչև ծնկները մերկ մտնել ջրած արտը, իսկ կանանց համար այդ դիր-քով տղամարդկանց երևալը անթույլատրելի էր ժամանակի բարքերի տեսա-կետից:

Աչքի է ընկնում կնոջ աշխատանքի վարձատրության խիստ ցածր չափը: Քաղհանի աշխատանքը թեև բավական ծանր է, սակայն նրա վարձատրու-թյունը սովորաբար կազմում է տղամարդ հասարակ բանվորի աշխատավարձի կեսը: Կանայք վարձվում են սովորաբար գործատիրոջ հացով, քիչ դեպքերում միայն՝ խոշկամուղղ: Վերջին դեպքերում նրանց դրամավճար աշխատավարձը գերազանցում է առաջիններից 50—75 տոկոսով:

Բավական հաճախ ենք պատահում դեռահասների և մանուկների վարձու աշխատանքի կիրառման: Սրանք «լուծ են քշում» (զուլանի, արորի), «չայիր հավաքում» (այգեփորից և վարելուց հետո մուլախոտեր հավաքելը), «դուշ քշում» (ցանքի և կալի ժամանակ թռչուններ քշում) և այլն: Սրանց աշխատավարձն ավելի ցածր է, քան կանանց աշխատավարձը: Բերենք մի օրինակ, 1750 թվա-կանին սրանց աշխատավարձը կազմում էր օրը 20—25 դիան, մինչդեռ կա-նանցը՝ 30—40 դիան, իսկ տղամարդ բանվորինը՝ 55—67 դիան: Զիշտ է. XIX դարի սկզբին այս աշխատավարձը բարձրանում է և հասնում 56 դիանի (խոշկամուղղը՝ 117 դիանի), սակայն այդ ժամանակ կանանց աշխատավարձը հասնում է 100 դիանի, իսկ տղամարդկանցը՝ 167—200 դիանի (խոշկամուղղը՝ 350 դիանի):

Ուշագրավ է նաև գյուղատնտեսության սպասարկող արհեստավորների աշխատավարձը: Այս կարգի արհեստավորներից, մանավանդ շինարարության մեջ, հաճախակի հանդիպում ենք բանահին (որմնադրին) և հյուսնին: Պետք է նկատել, որ այս կարգի արհեստավորներն ամսավարձով կամ սեզոնավարձով կարող էին աշխատել միայն խոշոր տնտեսություններում, ինչպիսին էր, օրի-նակ, էջմիածնի տնտեսությունը: Սրանց աշխատավարձը համեմատաբար բարձր էր:

1774 թվականի դավթարում կարդում ենք.

«Պողոս խառատն քաղքցի ի յանցեալ յունվարէն սկսեալ մինչև ցայս յու-նուարիս մուտն ամառ-ձմեռ բանեալ էր. որոյ վարձն օրամուղղ (օրավարձով — Բ. Հ.) հետսպ արարեալ ետուք 2 (6) թուման ԳՌԻԶՄ (3750) դիան» (թղթ. 3, վավ. 8):

Հաշվելով տարեկան 300 աշխատանքային օր, խառատի միջին օրավարձը կլինի 63750 դ. : 300—մոտ 220 դիան: Սրա հետ միասին խառատն ստացել է սնունդ: Համեմատության համար հիշենք, որ հասարակ բանվորը (փորվոր,

էտվոր և այլն) ստացել է միջին հաշվով օրավարձ սննդով 2 շահի=100 դիան, առանց սնունդ (խոշկամուզդ)՝ 150 դ. = 167 դիան: Ինչպես տեսնում ենք խառատը, որն ամբողջ տարին ապահովված էր աշխատանքով, ստանում է 2 անգամ ավելի, քան հասարակ բանվորը, որը բացի այս, ապահովված չէր մշտական աշխատանքով:

Ուշագրավ տեղեկություն ունենք նաև արհեստավորի աշակերտների աշխատավարձի մասին:

1763 թվականի դավթարում կարդում ենք.

«Ուստա Արրահամն բանեցաւ հինգ օրն երկու հարիւր յիսուն դիանով. իսկ աշակերտն մեկ հարիւր տասն և հինգ դիանով»:

Աշակերտի աշխատավարձը, այսպիսով, ավելի քան երկու անգամ պակաս է եղել վարպետի աշխատավարձից: Աշակերտ անվանված է այստեղ հավանորեն վարպետացուն, արդեն սովորած, բայց վարպետության կոչում չստացած աշխատավորը:

Աշխատավորի ուսուցիչ աշխատավարձը որոշելիս խիստ կարևոր նշանակություն ունեն ապրուստի համար և կենցաղում գործածվող կենսամթերքների, հագուստեղենի գները: Նատուրալ տնտեսության ֆոնի վրա ներքին առևտուրը լայն զարգացում ստանալ չէր կարող: Գյուղացիական մասսան շատ քիչ էր մասնակցում շուկայական հարաբերություններին: Ներքին առևտուրը սահմանափակված էր տեղական նեղ շրջանակներով. ուստի տարրեր մահալներում (դավառներում) միևնույն կենսամթերքի տարրեր գներ կարող էին լինել: Ծիշտ է, էջմիածինը կապեր ուներ երկրի բոլոր դավառների հետ և նրանից դուրս, գնումներ կարող էր կատարել իր կարիքների համար այն տեղերում, որտեղ մթերքն էժան էր, սակայն ժամանակի տրանսպորտային անհարմարությունները շատ էին բարձրացնում գները, ուստի գնումները մեծ մասամբ կատարվում էին վաղարշապատի ու Երևանի շրջակա գյուղերում և գլխավորապես տեղական մուրաղարներից ու թիուղարներից: Սակայն այս տեղերում էլ միևնույն տարվա ընթացքում միևնույն իրերի գների մեջ հաճախ նկատվում են բավական ուժեղ տատանումներ: Տատանումներ են նկատվում միևնույն մթերքների գների մեջ նաև միևնույն վայրում տարրեր ամիսներին: Այսպես, օրինակ, ցորենը, գարին և այլ հացահատիկներ ձմեռվա և մանավանդ գարնան սկզբի ամիսներին ավելի թանկ են լինում, քան ամառը՝ բերքահավաքի ամիսներին, և աշնան սկզբին: Հացահատիկները թանկանում են նաև երաշտի, ցրտահարության և այլ արհավիրքների հետևանքով առաջացած բերքի պակասության ժամանակ: Այս բոլոր հանգամանքները դժվարացնում են գների շարժման մեջ որոշ օրինաչափություն դրսևորելու հնարավորությունը: Հացահատիկների թանկությունը անդրադառնում է աշխատավարձի վրա: Մի կողմից այն զրգում է բանվոր-մշակին պահանջել ավելի աշխատավարձ, որը պիտի նպաստեր նոմինալ աշխատավարձի բարձրացմանը, սակայն, մյուս կողմից՝ վարձու աշխատանքի շուկայի խիստ սահմանափակվածությունը պիտի զրգեր օրավարձով աշխատող մշակին խուսափել խոշկամուզդ աշխատելուց և ձգտել աշխատելու «հացը գործատիրոջից» պայմանով, բավարարվելով գործատիրոջ հացի արժեքի վրա թեկուղ չնշին դրամական հավելումով. այս հանգամանքն իջեցնում էր խոշկամուզդ աշխատավարձը: Սովի և խիստ թանկության տարիներին շատերն աշխատում էին միայն «հացի տիրի», այսինքն՝ միայն սնունդ ստանալով գործա-

տիրոջից: Զաքարիա Ազուլեցու «Օրագրություն» մեջ հանդիպում ենք նման մի նկարագրության:

«Թվին ՌՃԻԲ (1673) յունվար ամսոյն սկսաւ սղութիւն հացի մինչև ի յուլիս ամիսն, որ նոր ցորեանն դուրս եկաւ. ոչ թէ միայն Դողթայն տունս, այլ ամենայն երկիրս այսպէս... Շատ մարդ բանջարաւ ապրեր, շատ մշակ առանց վարձի բան կանէր»¹:

Մեր ձեռքի տակ, ինչպես ասացինք, կան մոտ 80 տարվա գներ, ինչպես կենսամթերքների, այնպես էլ հագուստեղենի ու կենցաղային զանազան իրերի: Գների վերաբերյալ այդ տվյալները, ինչպես նկատեցինք նաև աշխատավարձի տվյալների մասին, անընդմիջվող, հետևողական մի շարք չեն կազմում: Նրանք ցրվել են և պատահական: Որպեսզի հնարավոր լինի տալ գների շարժման գոնե մոտավոր պատկերը, խմբավորել ենք տվյալները ըստ տասնյակ տարիների՝ 1750—59, 1760—69 և այլն: Այս դրությամբ դիտելով գների շարժումը՝ նկատում ենք առաջին հերթին գների աստիճանական բարձրացում: Այսպես, գարին, որն ըստ երևույթին ամենից գործածականն է եղել չքավոր, գուցե և միջակ գյուղացիության համար և էջմիածնի սննդամթերքային գնումների մեջ ամենից մեծ տեղն է բռնում (երևի մշակներին կերակրելու համար), 50 դիանից (1740—49) բարձրացել է 375 դիանի (միջինը 1810—20 թվականներին), այսինքն թանկացել է 7,5 անգամ: Նույն ժամանակաշրջանում ցորենը 80 դիանից հասել է մոտ 500 դիանի (միջինը), այսինքն բարձրացել է մոտավորապես 6 անգամ, միսը՝ 5 անգամ և այլն: Կտավը, որ գյուղացիության հագուստեղենի հիմնական նյութն էր կազմում (սպիտակեղենը պատրաստվում էր կամ շներկած, կամ կարմիր ներկած կտավից, կապույտ ներկած կտավից պատրաստվում էր նաև արտաքին հագուստը) թանկացել է 4 անգամ՝ 40 դիանից բարձրանալով մինչև 160 դիանի: Գներն այս վերելքն առանձնապես աչքի է ընկնում XIX դարի սկզբի երկու տասնամյակներում:

Գների վերաբերյալ այս տվյալները հնարավորություն չեն ընձեռում բացատրել գների բարձրացման պատճառները: Վերջինս, անշուշտ, առաջին հերթին պետք է կապված լիներ շրջանառության մեջ գտնվող դրամի կուրսի անկման հետ, որը իր հերթին պայմանավորված էր դրամի մեջ գտնվող ազնիվ մետաղի՝ ոսկու, արծաթի բանակի իջեցման հետ: Դրամի մեջ ազնիվ մետաղի պակասեցման մի դեպքի մասին սլատումում է Զաքարիա Ազուլեցին իր «Օրագրության» մեջ.

«Թվին ՌՃԺԱ-ում (1662), որ Շահարաս իւր օլքին հրաման տվան, որ ամեն զառավխանէն արաւին Բ մսխալ կուրեն, որ Ե (5) շահանոց է, գերայ առաջ Դ (4) շահանոց էր»²:

Սակայն այս վերաբերում է XVII դարին: Մեր ուսումնասիրության ենթակա ժամանակաշրջանի վերաբերյալ էջմիածնի դավթարներից մեկում (1763 թվականի հոկտեմբերի 6-ի հաշիվներում) կարդում ենք հետևյալ ուշագրավ հոդվածը, որը գրել է ծախսարար վարդապետը.

«Փողն որ կուրեցաւ ձեռացս կայր վեց թուման փող... Բնասուր եղև մին թուման և երկու հազար դիան»:

¹ Չախարիա Ազուլեցի, Օրագրություն, էջ 114:

² Նույն տեղում, էջ 60, հմտ. էջ 71:

Թե ինչ պատճառով «փողը կոտորեցաւ», այսինքն՝ նրա արժեքը պակասեց 20 տոկոսով (1 թ. երկու հազ. դիանը = 6 թումանի 20 տոկոսին), այդ մասին ոչինչ չգիտենք: Սակայն, անկասկած, այդ հանգամանքը զգալիորեն անդրադարձավ գների վրա և որոշ չափով ազդեց նաև աշխատավարձի վրա:

Մենք կարող ենք բերել նաև հետևյալ հետաքրքրական փաստը, որը կապ ունի դրամի կուրսի անկման հետ: 1789 թ. ռուսական «եփրալ»-ը (իմպերիալը, որը տասը ռուբլիանոց ոսկի դրամ էր—Ք. Հ.) էջմիածնի դավթարում համարժեք է համարվել թուրքական 15 դուրուշին, որն իր հերթին հաշվվել է հավասար 1 պարսկական թումանի:

Դրանից քառասուն տարի հետո, 1829 թ., ըստ Ի. Շոպենի տվյալների, իրանական թումանը գնահատվում էր ռուսական դրամով 4 արծաթ ռուբլի, որը կազմում էր իմպերիալի 4,10-ը կամ 40 տոկոսը, այլ կերպ ասած՝ իրանական թումանի արժեքը ռուսական իմպերիալի (10 ռուբլիանոցի) համեմատությամբ իջել էր 60 տոկոսով:

Համեմատենք մի քանի առաջնակարգ անհրաժեշտության մթերքների գները 1789 և 1829 թթ. տվյալներով.

	1789 թ.	1829 թ.
Գարի (լիտրը)	60 դիան	125 դիան
Ցորեն »	80 դիան	175 դիան
Չալթուկ »	100 դիան	200 դիան
Կապահատ »	100 դիան	450 դիան

Գների այս բարձրացումը 2—2,5 անգամ կարող է բացատրվել առաջին հերթին իրանական դրամի կուրսի անկումով: Սակայն հազիվ թե դա կարելի լինի համարել միակ պատճառը. անշուշտ կան նաև այլ պատճառներ, որոնց պարզարանման համար մեր ձեռքին տվյալներ չունենք:

Նույն Ի. Շոպենը բերում է իր աշխատության մեջ սննդամթերքների գների մի ցուցակ, որը վերաբերում է 1829 թվականին, ըստ որում գները նշանակված են ռուսական արծաթ փողով: Բերում ենք այդ ցուցակը, ռուսական դրամի կողքին տալով նաև իրանականը.

Ցորեն՝ խալվարը 7 ս.—1 թում. 7500 դիան, լիտրը 7/100 ս.—7 կ.—175 դիան
Գարի՝ խալվարը 3 ս.—1 թում. 2500 դիան, լիտրը 5/100 ս.—5 կ.—125 դիան
Չալթուկ՝ խալվարը 8 ս.—2 թում., լիտրը 8 կ.—200 դիան
Ծխախոտ՝ լիտրը 50 կ.—1250 դիան
Սոխ՝ լիտրը 5 կ.—125 դիան
Բամբակ՝ խալվարը 120 ս.—30 թուման, լիտրը 1 ս.—20 կ.—3000 դիան
Գենազերչակ՝ խալվարը 15 ս.—3 թում. 7500 դիան, լիտրը 15 կ.—375 դիան
Կտավհատ՝ խալվարը 18 ս.—4 թում. 5000 դիան, լիտրը 18 կ.—450 դիան
Սիսեռ՝ լիտրը 20 կ.—500 դիան
Ոսկ՝ լիտրը 20 կ.—500 դիան:

Հետևելով աշխատավարձի շարժմանը, մենք կնկատենք, որ չնայած բավական զգալի տատանումներին, այն զնում է դեպի վերելք: Այսպես, 1750 թվականից մինչև 1820 թ., 70 տարվա ընթացքում հասարակ բանվորի աշխատավարձը (1-ին կատեգորիա) 50 դիանից հասել է մինչև 200 դիանի, այսինքն աճել է

¹ Ք. Հարությունյան, Օտարերկրյա դրամների շրջանառությունը և կուրսը Երևանի խանության մեջ XVIII դարի երկրորդ կեսին, Տեղեկագիր «Արմֆանի», 1910, № 3, էջ 74:

4 անգամ. կանանց (քաղհանավորներ, բրինձ ընտրողներ և այլն) աշխատավարձը 30—40 դիանից բարձրացել է մինչև 100 դիան (1800-ական թթ.), այսինքն՝ ավելացել է $3\frac{1}{3}$ —2,5 անգամ և այլն: Սակայն նոմինալ աշխատավարձի բարձրացում չի նշանակում աշխատավորի կենսական մակարդակի բարձրացում, քանի որ կենսամթերքների և հագուստեղենի գների աճը կատարվել է ոչ նվազ չափով: Այսպիսով, ընդհանուր առմամբ, ունի աշխատավարձի մեջ մենք վերելք չենք նկատում¹:

Կարևոր և հիմնական խնդիր է՝ պարզել, թե աշխատավորի աշխատավարձը համապատասխանում էր աշխատանքի արժեքին, թե ոչ, հասնում էր արդյոք կենսական միջինումի մակարդակին: Բանվորական ուժի արժեքի մասին Կ. Մարքսը գրում է. «Բանվորական ուժի արժեքը որոշվում է այն կենսական միջոցների արժեքով, որոնք անհրաժեշտ են բանվորական ուժ արտադրելու, այն զարգացնելու, պահպանելու և հավերժացնելու համար»² (ընդգծումները հեղինակինն են—Բ. Հ.):

Մի ուրիշ տեղ նա գրում է. «Աշխատուժի արժեքի վերջին սահմանը կամ նվազագույն սահմանը կազմում է ապրանքների այն քանակի արժեքը, առանց որոնց ամենօրյա մատակարարման՝ աշխատուժի կրողը, մարդը չի կարող վերանորոգել իր կյանքի պրոցեսը, ուրեմն՝ կազմում է ֆիզիկապես անհրաժեշտ կենսամիջոցների արժեքը: Եթե աշխատուժի գինն ընկնում է մինչև այս միջինումը, ապա նա ընկնում է իր արժեքից ցած, որովհետև այս պայմաններում նա կարող է պահպանվել և զարգանալ միմիայն հյուծված ձևով»³:

Վերը մենք բերեցինք մի շարք տվյալներ, որոնք վերաբերում են «գործատիրոջ հացով» և «խոշկամուղով»-ով աշխատող բանվորների աշխատավարձին:

Այդ տվյալները հնարավորություն են տալիս պարզելու, թե բանվորի ստացած օրավարձը քանի մարդ կարող էր կերակրել այնպիսի հասարակ սննդով, ինչով կերակրում էր գործատերը բանվորին: Համեմատելով այդ տվյալները՝ մենք կտեսնենք, որ խոշկամուղով աշխատավարձը գերազանցում է «գործատիրոջ հացով» աշխատողի դրամավճար աշխատավարձին 1,5-ից մինչև 2 անգամ. այսինքն խոշկամուղով աշխատող բանվորը լրիվ օրավարձով կարող էր կերակրվել 1,5-ից մինչև 2 անգամ. դուրս գալով իրեն՝ բանվորին, կմնա $1/2$ կամ 1 մարդ, որին կկարողանար կերակրել բանվորը: Սակայն պետք է

¹ 1940 թ. հրատարակած մեր «Крупное монастырское хозяйство в Армении в XVII—XVIII вв.» աշխատության մեջ, համեմատության դնելով Էջմիածնի վանական տնտեսության 1743 և 1800 թթ. տվյալները աշխատավարձի և գների վերաբերյալ, մենք դիտել էինք նոմինալ աշխատավարձի բարձրացման հետ նաև ունի աշխատավարձի որոշ բարձրացում (էջ 65): Երկու տարիների վերաբերյալ տվյալների վրա հիմնված այդ դիտողությունը պատահական ընդլայն է կրում և, ինչպես տեսնում ենք, չի հիմնավորվում ավելի շատ տարիներին վերաբերող և ավելի բազմաթիվ ու բազմազան տվյալներով, որոնք հիմք են կազմել մեր այս ուսումնասիրության: Գների շարժումը դիտելով, մենք նկատել ենք, որ այն տալիս է մեծ ելևէջներ առհասարակ, որ 1800 թվականից հետո մթերքների գներն ընդհանրապես ավելի արագ են աճում, քան աշխատավարձը, որով ունի աշխատավարձի այն երևույթական աճը, որ մենք դիտել էինք համեմատության դնելով երկու տարիների (1743 և 1800) տվյալները, չի նկատվում, երբ ընդգրկում ենք նաև 1800 թվականից հետո եղած տվյալները:

² Կարլ Մարքս, Հնտիր երկեր երկու հատորով, հատ. 1, Քաղաքակրթություն, Երևան, 1941, էջ 348:

³ Կ. Մարքս, Կապիտալ, հատ. 1, առաջին գիրք, Երևան, Կուսհրատ, 1933, էջ 138: 7 Հանգես, № 1

նկատի առնել, որ ոչ աշխատանքային օրերին (կիրակի և այլն) նա օրավարձ չէր ստանում և բացի այդ նա, մանավանդ գյուղատնտեսության բնագավառում, ապահովված չէր մշտական աշխատանքով: Ավելացնենք նաև այն, որ բացի սննդից բանվորը պիտի ունենար նաև այլ ծախսեր, որպիսիք մենք հաշվի չենք առել համեմատության ժամանակ: Այս բոլորը հաշվի առնելով, մենք գալիս ենք այն եզրակացության, որ մեր ուսումնասիրության ժամանակաշրջանում Երևանի խանության մեջ միայն վարձու աշխատանքով, հատկապես օրավարձով, բանվորը հազիվ միայն կարողանար գոյություն ունենալ. նա զրկված էր ընտանիք պահելու հնարավորությունից: Համեմատաբար ավելի տանելի պետք է համարել տարեկան աշխատավորների («ամալայների») վիճակը, որոնք սնունդ, հագուստ և ապրելու տեղ էին ստանում վաճառքից: Սակայն, նրանց դրամով ստացած աշխատավարձն էլ այնքան չնչին էր, որ չէր բավարարի անգամ մի հոգու ապրուստը հայթայթելու համար: Ուստի այդպիսիները մեծ մասամբ ամուրիներ էին, կամ հեռավոր տեղերից (մեծ մասամբ Թուրքահայաստանից) եկածներ, որոնք իրենց աշխատավարձի դրամական չնչին ավելցուկը տուն էին ուղարկում, գոնե փոքր չափով նպաստելու իրենց շրջվոր ընտանիքներին:

НАЕМНЫЙ ТРУД В ЕРЕВАНСКОМ ХАНСТВЕ В XVIII в.
И В ПЕРВОЙ ЧЕТВЕРТИ XIX в.

Б. М. АРУТЮНЯН

(Р е з ю м е)

Автор анализирует экономическое положение Ереванского ханства на протяжении XVIII в. и в первой четверти XIX в., до присоединения Восточной Армении к России. В этот период в Ереванском ханстве самым крупным было монастырское хозяйство Эчмиадзина — резиденции армянского католикоса. На основе изучения расчетных книг эчмиадзинского монастырского хозяйства, значительная часть которых хранится в архивном отделе Государственного Матенадарана Армянской ССР, а также армянских историографических источников, автор освещает вопросы, касающиеся условий наемного труда, и показывает размеры заработной платы в различные отрезки времени указанного периода. Данные, относящиеся к монастырскому хозяйству Эчмиадзина, автор считает характерными для всего ханства в целом.

Статья состоит из следующих разделов: 1) Сферы применения наемного труда; 2) Источники и контингент наемной рабочей силы; 3) Условия найма и формы заработной платы; 4) Размеры и движение заработной платы.